


Leksyon

9

"ANG KALIBUTAN SA MGA ESPIRITU"



Tuni- sumala sa mga pahimangno nga imong makita sa sinugdan sa unang leksyon.

1. Unsa ang mga manulonda?

- Ang mga manulonda maoy mga espiritung dili makita nga gibuhat sa Dios.

Heb. 1:14. Dili ba silang tanan mga espiritu man lamang nga sulogoon, nga gipadala aron sa pag-alagad alang kanila nga maoy nagapanunod sa kaluwasan?

2. Aduna bay mga maayong manulonda ug mga dautang manulonda?

- Oo. Aduna. Ang mga maayong manulonda nagsimba ug nag-alagad sa Dios, apan

mga dautang manulonda nagsimba ug nag-alagad ni satanas.

Mateo 25:31. Ug inig-abut na sa Anak sa tawo diha sa iyang himaya, ug sa tanang mga manulonda uban kaniya, Siya molingkod diha sa iyang mahimaya-ong trono.

2 Pedro 2:4. Ang mga manulonda wala kaloy-i sa Dios sa diha nga nakasala sila, hinonoa iyang gitambog sila ngadto sa infierno ug gibalhog ngadto sa mga lungib nga mangiob aron igatagana hangtud sa pagpanghukom.

3. Kinsa si Satanas?

- Si Satanas maoy usa ka dautan nga manulonda nga gihinginlan sa Dios gikan sa langit, sanglit buot man siyang magapataas sa iyang kaugalingon ibabaw sa Dios. Naila siya sa laing ngalan nga mao ang yawa o si Lucifer.

Isaias 14:12, 13. Naunsa ang pagkahulog mo gikan sa langit, oh kabugason, anak sa kabuntagon! . . .ug ikaw miingon diha sa imong kasingkasing: Ako mokayab ngadto sa langit, ituboy ko ang akong trono sa ibabaw sa mga bitoon sa Dios.

Lukas 18:18. Ug si Jesus miingon kanila, “Nakita ko si Satanas nga nahulog ingon sa kilat gikan sa langit.”

4. Unsa ang ginabuhat ni Satanas sa kalibutan karon?

- Ang dakung buhat ni Satanas sa kalibutan karon mao ang pagbabag sa matag-usa ka tawo aron dili makaalagad sa buhi nga Dios.

1 Pedro 5:8. Magmalinawon kamo sa hunahuna, managtukaw. Ang inyong kaaway nga mao ang yawa nagalibot-libot sama sa leon nga nagangulob nga nagitag iyang matukob.

Marcos 1:13. Gitintal siya ni Satanas . . . apan dihay mga manulonda nga nag-alagad kaniya.

5. Unsa ang dadangatan ni Satanas ug sa ubang mga dautang manulonda?

- Si Satanas ug ang tanang mga dautang manulonda igatambog da unya sa linaw nga kalayo.

Pinadayag 20:10. Ug ang yawa nga nag-pahisalag kanila gitambog ngadto sa linaw nga kalayo ug asupri diin atua na ang mapintas nga mananap ug ang mini nga profeta, ug didto pagasakiton sila sa adlaw ug sa gabii hangtud sa kahangturan.

ANG IMONG PAGABUHATON

1. Sublia pagsag-ulo ang mga sag-ulohon gikan sa una hangtud sa ikawalong leksyon.
2. Kon masag-ulo na nimo pag-ayo ang mga sag-ulohon, tubaga ang mga sag-ulohon gikan sa una hangtud sa ikawalong leksyon.